

東
華
續
錄

東華續錄

道光四十五

臣王先謙敬編

臣周綸蕃恭校

道光二十二年壬寅春正月庚戌朔以怡親王載垣爲御前大臣

○辛亥命齊慎往湖北會勘○丙辰楊國楨以病免以怡良爲閩

浙總督梁寶常爲廣東巡撫存興爲廣東布政使文俊爲江西按

察使

由廣東監運使遷

○丙寅以陳官俊爲戶部右侍郎

由通政使遷

○己巳

諭本日裕泰由驛馳奏官兵剿擊賊匪大獲勝仗一招據稱正月

初十日崇陽縣逆匪數千人由通山縣西越嶺突入又有數千從

小路盤踞高山欲行撲城施放槍礮經派防參將清保等率兵迎

剿把總魏鴻興奮勇先登官兵齊上奪據險要殺傷賊匪百餘人

追殺擊斃不計其數該匪等身受重傷者數十人皆被擒獲於軍

前斬首餘匪逃散又經官兵追擊斃賊數百名奪獲槍礮器械多件又初九日賊匪用小船多隻擁至蒲圻占據城外東南山坡官兵轟擊先後斃賊數百人該匪恃眾拒敵四面撲城勢甚猖獗經揀發副將雙福等帶領兵勇奮力進攻擊斃二千餘人落水死者百餘人生擒多名奪獲礮位燒毀船隻賊匪復於十一日撲城守備玉貴登城抵禦頗中槍傷復經雙福策應賊始敗去見在追逐接查等語覽奏甚爲欣悅賊匪恃眾撲城該兩邑派防文武員弁合力堵擊用少擊眾連次大獲勝仗挫其兇鋒可嘉之至把總魏鴻興先登奪險加恩著以守備儘先升用先換頂帶揀發副將雙福著賞戴花翎遇缺卽補守備玉貴著賞戴花翎以都司儘先升用該督裕泰勦辦逆匪見在崇陽通城兩縣雖未卽時克復惟該督派委員弁連獲勝仗尙屬調度有方著加恩賞戴花翎在事出

力員弁仍著該督查明保奏候朕施恩傷亡兵勇查明咨部照例議卹○辛未以故莊親王縣護弟縣諱襲爵○壬申諭孟保等奏攻勦森巴番夷殺斃首惡一摺森巴大頭目倭色爾蠶食侵占邊外大小部落實屬強橫茲復帶領賊眾搶占唐古特營寨數處並敢屢次抗拒官兵洵爲此案渠魁見經該大臣等札飭噶布倫等帶兵四面夾攻將倭色爾殺斃又殲斃大小賊目四十餘名賊匪二百餘名餘賊紛紛潰散逃往賊寨並據拉達克頭人及八底部落部長等呈獻軍器情願投降所辦甚好著該大臣等卽將逃散餘匪設法追拏搜剿淨盡務使不留遺孽仍飭該噶布倫等將喀壩噶爾等四處營寨夷賊探明多寡虛實進兵剿捕及早蕝事至此攻勦出力官弁著卽查明據實保奏候朕施恩○甲戌諭軍機大臣等本日據裕泰等奏防兵續獲勝仗見在分道進剿一摺

覽奏欣慰已明降諭旨令該督酌保出力員弁矣據奏先復通城以孤賊勢密飭台湧帶領官兵由臨湘巴陵進取副將雙福等管帶兵勇由閒道馳往通城收復該縣以後卽由南面進攻崇陽又派參將清保等攻奪界頭賊卡由東面進攻崇陽其西北兩路派遊擊謝正國等帶兵奪取小嶺賊卡劉允孝擬由白楊畈奪據西嶺等處進攻等語所辦甚好似此四面兜擒玄磨小醜無難一鼓殲除朕佇待捷音之至也○丁丑諭本日據裕泰等由六百里馳奏收復崇陽縣城生擒首要各犯一摺覽奏欣慰之至湖北崇陽縣逆匪鍾人杰本係在逃徒犯膽敢聚眾戕官連陷崇陽通城設立鍾勤王偽號並豎都督大元帥紅旗分設知縣千總偽職遣令匪黨攻撲附近城池罪大惡極覆載不容經總督裕泰馳往咸甯就近調撥官兵分守要隘賊匪攻犯通山蒲圻均經官兵擊斃嗣

提督劉允孝帶兵會剿調集官弁分兵五道同時並進昨據報到連奪賊卡已降旨將裕泰劉允孝交部議敘本日據奏大兵將次進攻先遣前署咸甯縣知縣夏廷樾前署崇陽縣知縣金雲門懸賞招覓土民羈縻首要各犯劉允孝亦募紳民嚮導內應自石盤山進攻夏廷樾會同遊擊謝正國在黑橋接仗陣殲賊匪三百餘名追殺一百餘名距賊巢白蠟橋五里地方又殺賊五十餘名該邑紳士誘令首逆出城經官兵義勇趕至合圍立將首犯鍾人杰及要犯陳寶銘汪敦族一併生擒該督卽由洪上地方前進攻復崇陽縣城安撫居民分兵前往通城接應收復等語逆匪於上年十二月十二日據城戕官建立偽號經該督等調兵防剿謀勇兼施在事文武官員弁兵紳民均能同心協力迅掃梟槍甫經四旬收復崇陽縣城生擒首要各犯辦理迅速甚屬可嘉裕泰前已賞

戴花翎著加恩賞加太子太保銜並賞換雙眼花翎劉允孝亦著
加恩賞換雙眼花翎發去花翎二支交裕泰劉允孝祇領在事文
武各員弁並嚮導內應羈縻誘獲之紳士民人及出力各義勇均
著據實保奏候朕施恩據奏該督行營經過地方紳民蕪香跪道
帶兵各員均能不妄殺戮見在地方救謐朕心甚慰所有留撤官
兵及善後事宜均著裕泰妥籌具奏逆匪鍾人杰陳寶銘汪敦族
著遴委妥員檻送京師盡法處治以伸國憲而快人心○以德誠
爲泰甯鎮總兵官調成剛爲刑部右侍郎由盛京刑部侍郎調○戊寅命齊
慎回四川提督任○是月展賑安徽無爲等十二州縣衛奉天遼
陽等六處新民等四廳縣災民給安徽泗州等二十二州縣衛浙
江海甯等七州縣水災口糧貸江西德化等七縣湖南武陵縣湖
北嘉魚等九縣衛陝西葭州等五州縣水災籽種口糧山西薩拉

齊慶歉收倉穀江蘇災區京右等營兵餉蠲緩浙江海甯等九州縣衛水災新舊額賦緩徵山東濟甯等十州縣衛正雜額賦展緩江蘇高郵等二十八州縣衛直隸安州等十七州縣通賦

二月辛巳

上御經筵

○諭據裕泰等由六百里馳奏收復通城

縣城續獲逆黨一摺覽奏欣慰據稱首逆鍾人杰攻占通城後派令逆黨汪敦族爲僞知縣隨帶崇陽匪徒千餘人在彼踞守嗣聞官兵分道進剿卽將汪敦族招回派令但扶瀧爲通城僞官該縣士民探聞崇陽各逆首就擒卽於正月二十二日將踞城逆黨但扶瀧及要犯但十沈長細送行營見派文武員弁馳往安撫居民等語此次逆匪先後占踞兩城擾害地方經裕泰劉允孝帶兵屢次挫其兇鋒又經吳其濬台湧堵截去路不至蔓延該督撫提督等調度有方剋期蕞事尙屬妥速除裕泰劉允孝業經加恩湖北

文武員弁崇陽紳民義勇已飭令保奏外吳其濬台湧防堵出力均著交部從優議敘所有湖南派出之文武員弁兵丁義勇等著吳其濬台湧查明實在出力者咨部議敘通城縣紳民嚮義輸誠縛獻踞城逆犯甚屬可嘉著裕泰查明保奏候朕施恩但扶瀧但十沈長三犯著裕泰審明後卽於該處正法裕泰仍當派委委員安撫兩城居民各復舊業勿令失所其善後一切章程悉心籌議辦理○丙戌命林則徐仍發往伊犁效力贖罪○戊子裕泰奏崇陽餘匪悉平○辛卯奕經等奏正月二十九日四鼓官兵潛赴甯波南門內應接入殺斃守門守礮洋人該洋人攜有手槍並施放三尖火塊及火箭等物漢奸冒充鄉勇黑夜不能辨認人眾擁擠礮械難施仍行陸續退出鎮海城內亦經官兵衝門而入擊殺洋人因火攻船隻未到亦仍退回見於甯波城外焚燒火輪船一隻

杉板船三隻擊斷三桅大船頭桅燒去上蓋復於鎮海城外焚燒
三桅大船一隻梅墟一帶亦經開礮擊壞杉板船兩路擊斃洋人
四百餘名此次官兵未能得手應請將臣等嚴加議處 上命暫
免議處仍策勉之○壬辰諭軍機大臣等麟慶奏查勘洪湖水勢
請改建滾壩豫籌宣洩一摺洪湖蓄洩機宜最關緊要近年逐漸
墊高設有盛漲勢難容納自應添籌分洩之路見據該河督查明
山盱仁河原建壩底過水猛驟易於衝跌請改建滾水壩一座較
舊制增長三十丈俾洩水得以舒暢並於壩下添築順堰攔堰等
工自係爲慎籌宣防起見惟工程較大本年旣難應用設遇大汛
經臨信智等壩斷不足以資分減據稱擬將舊義河再行權放一
次而衝跌過甚越堵爲難該河督於全湖形勢素所諳悉此次所
議改建石壩及權放義河之處於全局大有關係該河督仍當悉

心相度斟酌盡善妥籌辦理也○諭本日據奕經等奏長溪嶺慈谿山營盤被焚文蔚退回紹興府城奕經帶兵渡江應援尖山一帶已諭令嚴密防範矣江蘇上海寶山一帶與浙洋地面毗連著牛鑑督飭在防員弁小心偵探認真防備毋稍疏虞○命齊慎仍馳赴浙江軍營○命鄂順安堵治河南渦河○癸巳諭刑部奏各省辦理火器殺人案件多涉遷就請飭另行審擬一摺所奏甚是向來因爭鬪施放鳥槍殺人者以故殺論斬定例綦嚴從前舊案間有因本犯正欲捕打鳥獸適與人口角爭鬪被毆失跌以致震動火機銃斃人命酌擬絞候原以其事出無心量從寬典近來外省問刑衙門惑於救生不救死之說每遇火器傷人案件動輒援照定擬案情之真偽既雜則罪名之出入易淆若各直省俱似此辦理或聽兇犯狡供或任書吏蒙蔽何以飭法紀而重民命嗣後

著該督撫將軍都統府尹遇有火器傷人之案督同問刑各員詳細推鞠務得確情不得槩以震動火機爲辭稍涉遷就所有湖南省傳四發槍傷傳賤隴身死一案江西省溫儀豐銃傷甘景安身死一案著該撫等另行審訊實情定擬具奏○甲午改江蘇揚州府總捕同知爲糧捕同知通州糧河通判爲運河通判○乙未上臨壽安固倫公主園○諭王鼎等奏祥符大工合龍一摺上年六月河南祥符上汛漫口當派王鼎慧成前往會同朱襄鄂順安籌辦堵築事宜茲據奏稱二月初八日兩壩挂纜合龍尙未盡行閉氣恐有滲漏經該大臣等駐工督率員弁兵夫不停力作見在大工告竣層層壓實涓滴皆無十分穩固引河亦通暢東注全黃悉歸故道更喜鉅工告蒧在未交桃汛以前此皆仰賴 天恩默佑 河神感應朕心實深敬慰發去大藏香十炷著朱襄虔赴工

次各處

河神廟代朕敬謹祀謝以答

神庥所請動項建造廟

宇著准其勘估派員監造其封號扁額俟奏到時再降諭旨王鼎等在工實心實力經理得宜允宜特沛恩施以示獎勵王鼎著賞加太子太師銜仍與慧成朱襄鄂順安交部從優議敘並均著開復革職留任處分所有一切善後事宜著朱襄妥協經理倍加詳慎以期隄防鞏固永慶安瀾○丙申諭軍機大臣等寄諭揚威將軍奕經等劉韻珂奏大兵在慈谿失利事勢深可危慮一摺此次大兵進剿勢將得手旋被橫衝以致各兵潰敗人心惶惑所奏俱係實在情形見在奕經等分據要隘務當各矢血誠安撫士民保衛郡縣省城爲根本重地劉韻珂調度守禦力恐不支該將軍參贊等必應極力防堵毋稍疏虞其曹江尖山乍浦等處均應分兵防禦處處周密斷不可因偶爾失利自隳銳氣以期勉贖前愆又

另片奏壯勇戰敗潰散連日攜帶器械紛紛抵省該撫業經咨會各督撫等語此項壯勇本皆獷悍之徒該將軍等務當從長計較或酌留備用或咨令回籍毋滋後患其已經出境者見已降旨由四百里諭令江蘇安徽山東河南各督撫沿途妥爲彈壓毋令滋事並將健壯酌留備用所持器械追繳入官諒該督撫等必能遵照妥辦本日已降旨飭將伊里布改發浙江效力並令耆英馳赴浙江署理杭州將軍不日均可抵浙該將軍惟當協力同心攘外安內切不可再失事機也○己亥奕經等奏英人呈遞書函酌擬暫示羈縻並請續調官兵力圖進剿得旨事已如此添調何難前番布置似乎確有把握一經動作受虧退步又欲俟數千里外續調之兵到齊再行進剿無論曠日持久必能保其成功乎○庚子諭裕泰奏請將殉節之知縣等分別賜卹一摺湖北崇陽縣知縣

師長治到任甫及百日倉卒遇難典史王光宇及該縣師長治之妾吳氏姪女師氏同時自盡並被殺之家人曹斌均堪矜憫應如何分別賜卹之處著該部查議具奏尋予師長治王光宇世職○癸卯命齊慎仍爲參贊大臣○賞伊里布七品頂帶赴浙江軍營○移貴州都勻縣訓導駐八寨廳○丙午諭前因奇明保年逾七旬精力就衰降旨命耆英馳往浙江署理杭州將軍因念省城爲根本重地防堵尤關緊要將軍參贊分駐各處要隘止有特依順一人帶兵在省恐不足以資控制耆英著頒給欽差大臣關防馳驛前赴浙江省城會同特依順嚴密防守如兵力尙單應調本省及他省官兵卽著斟酌情形一面飛檄調取一面由驛具奏儻有疏虞惟耆英特依順是問劉韻珂身任巡撫守土是其專責一切防堵事宜亦著會同籌辦至浙省沿海各處口岸仍責成奕經文

蔚齊慎擇要防守相機攻剿該將軍大臣等惟當協力同心以期戰勝守堅毋負委任勉之望之○是月展賑盛京遼陽等處江蘇上元等八縣災民

三月壬子

上幸南苑行圍○諭軍機大臣等奕山等奏籌議戰

守情形並祁項等奏軍需數目應辦事宜各一摺據奏機鼎查自浙駛回香港添船自固並邀他國貨船同泊議戰實無把握惟議守省城可保無虞等語覽奏均悉著卽責成奕山等嚴密防範慎固封守倘有疏虞惟奕山等是問惟所奏添造兵船曠日糜費又係徒託空言殊屬無謂至虎門十處礮臺據稱無船不能護修若必待船隻造成始行動工爲日甚長何時方可蒞事其酌截兵勇一節准其將廣西兵一千八百名留東備防貴州四川江西湖北各兵著分別盡撤另挑本省兵勇防守儻本省之兵勤加訓練可

資得力卽廣西之兵亦可隨時酌撤再見存義勇二萬六千餘名
爲數亦覺太多著該將軍等會同遴選擇精銳得力者令其協同
官兵分地駐守餘著酌量再行裁減仍須妥爲安頓不可別滋事
端所奏每月需銀十三萬九千二百餘兩如能將兵勇逐漸裁撤
經費自更節省著祁墳梁寶常力加撙節毋任虛糜○乙卯諭奕
經等奏查明接仗陣亡各員請分別賜卹一摺覽奏深爲憫惻浙
江金華協副將朱貴在長谿嶺軍營身受三處槍傷臨陣戰歿其
子武童朱昭南隨同打仗身受兩槍同時殉難實屬忠義可嘉朱
貴著照總兵例賜卹朱昭南一併議卹仍著該將軍等查明朱貴
見尙有子幾人及朱昭南有無子嗣之處卽行具奏候朕施恩甘
肅西甯鎮左營遊擊黃泰陝西隆德營守備徐宦陝甘督標都司
下馬關營守備陳芝蘭四川大金河千總加副將銜巴圖魯阿本

穰瓦寺土守備哈克里浙江候補知縣顏履敬均著照例賜卹以
慰忠魂○丁巳 上還京師○己未諭壽臧和碩公主著指配二
等男爵侍順之子閒散恩醇作爲和碩額駙所有派出借老大臣
選擇吉期下嫁事宜著內務府大臣照例辦理○諭軍機大臣等
穆彰阿等奏遵議帑項軍儲一摺據奏財賦所入歲有常經糧餉
所資用無定數請飭各督撫體察輿情熟籌良法等語國家經費
有常必應量入爲出見在軍務緊要費鉅用繁尤須妥爲籌畫前
據鄂順安奏豫省城工勸諭紳民捐輸興築此外山東兩淮浙江
長蘆均經先後報捐是在外籌畫一費卽在內省撥一項著各該
督撫體察輿情熟籌良法其應如何因地制宜於經費實有裨益
而仍無拂於民情卽行條議具奏至應徵一切新舊正雜錢糧亦
著統行查覈轉飭按款依限徵收毋使短絀○辛酉命前任四川

布政使鍾祥以三四品京堂候補○太子太保前任浙江提督二
等子王得祿卒晉贈伯爵並太子太師賞銀五百兩治喪予祭葬
諡果毅○庚午奕經等奏二月二十五日夜閒飭鎮海縣知縣葉
莖商同鎮海縣生員王師真統領火藥船隻及水勇數十名由僻
港駛至鎮海緊對英人大船發火即將停泊稅關道頭之大船後
尾燒然洋人驚起呼號不及解放杉板紛紛竄入水中彼時生員
王師真卽乘勢督催水勇頭目人等將火藥船隻重重繼進各杉
板船四面圍住過船搜查火具觸動機關各船火藥立時並發附
近暗伏鄉勇亦各發火開槍作爲疑兵應援鄉勇水勇陸續撤退
並無一人受傷焚毀洋船及燒斃洋人不少賞王師真六品頂帶
藍翎葉莖上年失守縣城免其治罪○丙子奕經等奏原任處州
鎮總兵鄭國鴻之子候補批驗所大使鄭鼎臣等前經派令招集

水勇雇募火攻船隻會同營員渡洋暗伏定海縣城內外並各巒
島豫備焚燒攻勦三月初四日鄭鼎臣暗向各船裝載柴草火藥
等物駛至梅山港分三路向北前進守備徐楨寶督率火攻船隻
先由十六門分作七排放進道頭該處停泊大洋船三隻各排船
隻重重繼進圍住洋船卽時引然正值東南風大作火光燭天人
聲鼎沸洋人始猶用礮轟擊繼見篷索全然無處躲避向三板船
逃竄武舉蔣忠清等帶兵接應亦開槍放礮迎面攻擊洋船驚亂
復自相觸沈多隻並有退回仍被焚燒者其逃走三板洋船奔向
竹山門水勇頭目袁高榮帶船自小渠山駛來該洋人用槍箭向
射轉將柴草燒然直向噴燒又焚洋船多隻其蝦峙港停泊最大
洋船一隻千總韓慶瑞王廷鰲並壯勇頭目李世茂等帶領大號
火攻船二十餘隻一齊放進乘風發火首先燒然大桅篷索等件

洋人僅止開放四礮船板均已引然不及解放三板船各焦頭爛額鳧水逃生洋船火藥被燒煙焰飛過山頂卽時桅倒船沈不見蹤迹維時軍功頂帶詹成功把總吳大升在定海城內望見火燄知係火攻得手當卽放火延燒房屋擊殺洋人數十名生擒一名奪獲刀槍等件其城外埋伏之委員銀沆等焚燒沿城房屋以助聲勢鄭鼎臣復見五奎山有洋人屯紮上山攻擊旋卽潰散我兵追殺十餘人其自北駛來接應之火輪船二隻亦被開礮擊破統計燒毀大船四隻三板船數十隻燒斃沈溺擊殺三四百人我兵並無傷亡奏入賞奕經雙眼花翎白玉喜字翎管一文蔚頭品頂帶與特依順均交部優敘在事出力員弁著查明據實保奏○陝甘總督恩特亨額卒予祭葬○以富呢揚阿爲陝甘總督璧昌爲陝西巡撫由伊犁參大臣遷○命文麟以四品京堂候補以萬貢珍爲安

徽按察使

由甘肅平慶涇道遷

○丁丑湖南提督楊芳以病免賞食全俸○

是月蠲緩河南鄭州積澇地畝逋賦

夏四月癸未達洪阿姚瑩奏據淡水同知曹謹署鹿港同知魏瀛

澎湖通判范學恒彰化縣知縣黃開基護副將關桂稟報正月三

十日有三桅洋船及杉板船在淡水彰化交界之大安港外洋欲

行入口見兵勇眾多攻撲不進復退出外洋經貓霧揀巡檢高春

如及大甲巡檢謝得琛所募之漁船粵人周梓等與洋船上廣東

漢奸作土音招呼誘從土地公港駛進果爲暗礁所閣其船欹側

入水該處理伏兵勇齊起關桂及署北路右營遊擊安定邦督令

署守備何必捷千總何建忠李青雲把總翁標桂林飛鵬等施放

大礮奮力攻擊其船遂破洋人紛紛落水死者不計其數復有數

十人手持短械跳上漁船該廳縣將備同大甲巡檢謝得琛竹塹

巡檢汪昱外委蕭振輝李吳魁等及義首總理兵勇奮力圍擊殺斃生擒數十人奪礮十門及鐵礮鳥槍腰刀圖書各件賞達洪阿太子太保阿克達春巴圖魯號姚瑩二品頂帶均交部優敘在事出力員弁均著保奏○丙戌諭向來京外大員子弟每屆五年查辦一次挑取侍衛拜唐阿嗣後如遇挑取侍衛年分所有大員子弟著無庸挑列○己丑奕經等奏自鄭鼎臣等焚燒大小洋船甯鎮兩城洋人驚惶無措又加伏勇隨處驚擾自二月以來先後擒斬沈溺各逆不下數百名益覺窮蹙見經管帶官兵之遊擊高峻及分帶壯勇之請升副將托金泰帶兵趕進乘勢截擊洋人遙見兵勇至至不敢迎拒紛紛奔上船隻遁赴鎮海卽於三月二十七日收復甯波郡城○壬辰諭孟保等奏攻克幾湯賊寨收復達壩噶爾等四處營寨地方一摺上年森巴番夷勾結三部落賊匪侵

占唐古特營寨地方經該大臣等進兵攻勦殲斃賊首倭色爾並
拏獲句結滋事之拉達克賊目古朗堪等四名前後共殺斃森巴
及拉達克賊目四十餘名投降者八百三十六名計幾湯克復未
及兩月卽將夷賊所占之達壩噶爾等處營寨地方一千七百餘
里全行收復見在邊境肅清孟保海樸督辦軍務調度有方戴功
迅速均著交部從優議敘所有出力官弁著卽查明據實保奏候
朕施恩陣亡番官番兵查明照例辦理其堆噶爾本各營寨逃散
番民並著札飭噶布倫等妥爲安撫應辦善後事宜著孟保等體
察情形妥議章程具奏○耆英等奏初七日午刻有火輪船二隻
大小洋船二十餘隻由乍浦所轄之黃盤山東首洋面而來未刻
火輪船拖帶三板船自彩旗港駛入西行停泊旋復往來遊奕已
函致副都統長喜會同揚威將軍派令員弁督率兵勇晝夜防守

並委令伊里布帶員馳往設法羈縻○甲午

上詣

黑龍潭祈

雨○諭軍機大臣等奕經等奏浙洋海水由鎮關直達慈谿餘姚擬於蜀山渡及梅墟地方相度形勢釘椿築壩設法收復鎮海定海等語覽奏已悉羅卜丹帶領千餘人在招寶山踞守鎮海洋船停泊三隻意圖牽制我兵得以大幫分擾他處見在乍浦已有船二十餘隻該處毗連江蘇地方緊要尖山一帶係屬省城門戶關繫非細該二處兵力如覺單薄自應添兵防守若以全力攻復鎮定二城轉致乍浦尖山或有疏虞實屬得不償失著該將軍等一面於曹娥江餘姚等處嚴密防堵一面速派參贊一人統帶得力弁兵馳往乍浦相度機宜可剿卽剿當守則守切勿顧此失彼致墮詭計昨據耆英等奏派委伊里布成齡馳赴乍浦設法羈縻一節驚惶失措辦理殊未得宜已明降諭旨令耆英卽赴廣東將軍

任矣所帶伊里布威齡卽交奕經留營差遣如無可委用之處卽一面奏聞一面飭令回京該將軍等受國重寄責無旁貸務當通籌全局不致蔓延江浙沿海地面方爲不負委任勉之又勉○劉體重以病免以朱士達爲湖北布政使傅細勛爲陝西按察使

東體運使

○乙未諭軍機大臣等耆英等奏本月初九日洋船排列

陣勢另用杉板船數十隻分撲西山觜唐家灣等處大船開放大礮直向內偏復由鎧光山等處登岸火箭齊發城內漢奸接應各兵紛紛潰散乍浦失守等語省中地勢縣長嘉興府城爲江浙咽喉之地設有疏失關繫非細甯波鎮海俱係殘破之城收復自可從緩著奕經等接奉諭旨酌留參贊一人在曹娥江一帶駐守杜其竄入紹興之路該將軍同參贊一人迅卽統得力弁兵馳往嘉興駐紮應援省城儻該二處稍有疏虞惟該將軍等是問懷之至

此次官兵並未接仗遂爾紛紛潰散此皆平日紀律不嚴所致思之深堪痛恨著奕經等查明是日情形究竟若何其首先潰散弁兵著一面卽在軍營正法一面據實奏聞毋得稍存姑息其江蘇防堵事宜已諭知牛鑑陳化成嚴密辦理矣○以乍浦失守奕經文蔚特依順劉韻珂下部嚴議尋議上得旨均著加恩改爲革職留任奕經前次賞戴雙眼花翎文蔚賞加頭品頂帶並交部議敘及特依順前次交部優敘之處一併撤銷○己亥雨○命抽查漕糧御史仍駐大通橋○庚子諭浙江提督余步雲經朕畀以海疆重任上年定海失陷總兵王錫朋等帶領各路官兵轉戰六晝夜之久該提督並不督兵應援以致孤城失守迫至鎮海甯波接踵失事總督及總兵等先後殉難余步雲輒敢節節退避當鎮海甯波未失之時與定海尙隔海洋若使鼓勵士卒奮勇當先嬰城固

守地勢既據上游精兵復聚重鎮何至四路潰散頃刻不支言念
及此實堪痛恨總緣該提督平時既訓練無方臨事復貪生畏敵
首先退縮大懈軍心作此厲階罪難擢髮早經降旨飭令揚威將
軍奕經查明屢次退敗情形按律治罪用彰國憲比因軍務喫緊
查訪非倉卒所能遂先其所急暫緩逮問乃軍營將弁兵丁等相
率效尤紛紛潰散此皆余步雲爲之倡也昨據奕經等奏稱乍浦
失守不過數時之久該處將弁兵丁不爲單弱何至尙未交鋒遽
爾奔潰棄城幾同兒戲總因余步雲身爲提督屢失城池並未查
究遂人人各懷倖免之心不思破敵之計遲延觀望坐失事機若
再不整飭紀綱大申軍令何以挽惡習而振軍容余步雲著卽革
職交奕經傳旨鎖拏派委委員押解送京交軍機大臣會同刑部
審訊治罪至前次飭查失守鎮海定海甯波三城及此次乍浦失

事各文武員弁兵丁除鎮海縣知縣葉堃著有微勞功過尙足相抵外其餘均著交經分別查明首先潰散之員弁兵丁開單請旨此後務當嚴申紀律如再有臨陣退怯首先潰散者卽以軍法從事一面正法一面奏聞毋許仍存姑息致令士氣不揚該將軍等其整勵戎行副朕委任○諭孟保等奏酌擬拉達克及八底部落人等准其投誠商上並添設防範乞金番民章程一摺上年森巴番夷侵占唐古特營寨地方業經該大臣等剿除首惡收復地方邊境肅清茲據噶布倫策墊等稟據拉達克番民及八底部長人等公同懇求准其投歸唐古特商上情願各防邊界協力堵禦等情拉達克等部落向與唐古特通商茲既願投商上自應俯如所請以順輿情惟該部落既歸商上必應妥立章程以爲久安之計著照該大臣等所議將堆噶爾本空金番民酌定五百名由

前後藏番民內擇其精壯派令前往充當金夫此內揀選明白曉事者十人作爲頭目以資約束並於前後藏揀派熟悉操演之戴琫一名如琫二名甲琫二名定琫四名前往駐守教習技藝該番民等既以空金爲業無庸另籌經費其派往之戴琫等在彼駐守准其以二年更換如果地方安靜教習已有成效由駐藏大臣量加鼓勵倘有廢弛查明懲辦惟該戴琫等在藏均有操防之責著俟試看三四年後由該大臣會同噶勒丹錫呼圖薩瑪第巴克什酌量情形再行撤回歸伍其教習等事卽責成該處營官按照妥辦以資防範○癸卯王鼎奏病體未痊請展假二十日調理得旨卿務須安心調攝著再賞假一月○甲辰命耆英仍留浙江辦理軍務○乙巳以洋船退出乍浦命各海口申嚴兵備○諭耆英奏遵旨馳赴廣東一摺昨已有旨令該大臣暫緩赴粵俟諸務妥協

折回杭州省城協同防守見在嘉興乍浦一帶尙須布置耆英著
遵照昨奉諭旨於嘉興乍浦一帶酌量扼要處所駐紮控制妥辦
諸務諸大臣昨奏外委陳志剛回稟該夷不願交戰止求通商該
外委既經面見必非兩言而止此外有何言語並未詳晰聲敘著
耆英據實具奏○丙午以王庭蘭爲江甯布政使徐繼畲爲廣東
按察使

由鹽運使遷

○予浙江死事署乍浦同知韋逢甲祭葬世職○

逆首鍾人杰等伏法○丁未奕經等奏初八日壯勇頭目王建功
等在定海縣螺頭門槍擊洋人鄉勇白成位等用火罐拋擲燒然
洋船洋人竄避落水王建功帶領鄉勇民人將船奪獲駛回委員
鄭鼎臣等接奉札諭裝載火藥從後路進兵牽制十二日南風大
作副將鄭宗凱遊擊池建功派令守備徐楨寶將火攻船裝配七
十餘隻督同兵勇水勇將船繞近該洋人大船先暗放火藥罐一

聯卽時轟破船頭我船連排繼進火燄飛騰四面放槍喊殺洋船多被焚燒計燒斃沈溺及擊斃者約有三百餘人將兩桅大船燒去半截三桅大船三隻兩傍燒毀並燒斷大桅兩根燒壞大杉板船四隻奏入擢鄭宗凱福建福甯鎮總兵池建功以參將升用均賞花翎鄭鼎臣賞四品頂帶花翎賞還奕經雙眼花翎文蔚頭品頂帶予特依順齊慎優敘○是月貸湖南鳳凰等五廳縣屯丁苗佃籽種口糧山西吉州等十四州縣倉穀緩徵山西陽曲縣薩拉齊廳通穀

五月己酉朔命伊里布以四品頂帶署乍浦副都統○太子太師大學士王鼎卒晉贈太保命成郡王載銳奠茶酒賞銀一千五百兩治喪予祭葬諡文恪入祀賢良祠命其孫琅璽均俟及歲時帶領引見○庚戌諭奕山等奏查明前任提督關天培陣亡時兵

丁散走情形設兵所以衛民必期有勇知方近日海疆防守官兵奮勇殺賊者固不乏人至於臨陣退避見賊先逃以致主帥陣亡汎地失守此種失律士卒不難悉數駢誅因念罪有首從不忍槩予夷誅特命將軍督撫等嚴查懲辦該將軍督撫等身膺重寄具有天良自應將實在情形迅速覆奏候朕酌量情節法所難宥者立正刑章情有可原者量從末減庶於嚴申紀律之中仍寓欽恤慎刑之意乃本日奕山等奏關天培在靖遠礮臺陣亡兵眾同時逃走並無確切證據等語郭標等五名既據何居桐指出卽應親提研訊方可得有實據乃直至該把總畏罪自盡始行親提以致恃無質證率卽擬結僅請將郭標等五名革伍責懲殊屬輕縱所有逃散之兵丁郭標歐振彪唐成恩吳就棻蘇勝亮均著發往新疆充當苦差以示懲儆又另片奏擊獲漢奸溫東幅一名究出被

脅入夥赴官投首之從犯蘇亞磬等三名將溫東幅正法蘇亞磬等擬軍等語廣東漢奸在在皆有該省年餘來僅獲一溫東幅而被脅入夥之蘇亞磬等三犯又稱赴官投首可見平日並不認真查拏不過以此塞責奕山身任統帥祁墳梁寶常均係封疆大吏乃陳奏事件如是不誠不實迹近欺詐辦理亦屬錯謬奕山祁墳梁寶常均著交部嚴加議處○甲寅以故大學士王鼎靈柩入城治喪命左副都御史何汝霖前往奠醑○丙辰湯金釗緣事降光祿寺卿○丁巳湯金釗以老病乞休賞二品頂帶休致○戊午諭前因奕山等覆奏關天培陣亡時兵丁走散情形迹近欺詐辦理錯謬當降旨交部嚴議茲據該部議以革職實屬咎所應得奕山著革去御前大臣領侍衛內大臣都察院左都御史從寬仍留正紅旗漢軍都統與祁墳梁寶常均著改爲革職留任以觀後效○

予傷亡乍浦副都統長喜祭葬卹廕賞銀九百兩治喪○己未牛
鑑奏五月初一日三桅洋船一隻火輪船二隻停泊吳淞口外開
放大礮飭備戰船各一百餘隻橫排口內江面以防奸細竄入並
出示諭止各商船俟洋船退後再行進口該洋船與強脅之商船
二十餘隻停泊口外相持五日不見動靜其停泊羊山戴山之十
一隻並黃家灣以東之三隻亦未駛來洋船停泊洋面數日內開
礮一百數十餘出我軍並未施放一槍一礮靜以待動提督陳化
成設伏安礮將士用命並飛調壽春鎮總兵尤渤帶兵一千名馳
至上海應援○禮部尙書色克精額卒予祭葬○調恩桂爲禮部
尙書以吉倫泰爲理藩院尙書禧恩爲理藩院左侍郎署盛京將軍○
實授奎照左都御史○轉王植爲刑部左侍郎調魏元烺爲刑部
右侍郎以何汝霖爲兵部右侍郎由左副都御史遷○命何汝霖在軍機

大臣上學習行走○壬戌牛鑑奏英人突集船隻攻犯寶山江南提督陳化成督率弁兵在塘堵禦相持七日之久初八日卯刻驟聞塘岸礮響知係開仗該督親往督戰遙見洋人將巨礮安於大桅之上重疊施放陳化成在塘對擊轟壞洋船三隻傷斃洋人數十名該洋人疊放大礮火箭不止將教場房屋將臺打破旋報提督陣亡縣城旋亦失守臣退至嘉定收集潰兵馳抵太倉防堵劉河以過入省要道奏入命奕經酌派參贊一人帶兵赴蘇耆英伊里布馳赴上海會同牛鑑相機籌辦劉允孝署理江南提督○諭陳化成久歷海洋素昭忠勇此次臨敵亦極果敢竟爾捐軀允宜特沛殊恩以慰忠靈陳化成著交該部照提督例賜卹仍加恩賞銀一千兩卽由江蘇軍需局給發並著該原籍督撫查明該故員子孫幾人據實具奏並於殉難處所及該原籍各建專祠該故員

靈樞回籍時並著各該地方官妥爲照料其陣亡將弁兵丁由該督一併查明具奏尋予祭葬世職賞治喪銀一千兩諡忠愍○丙寅晉封琳嬪烏雅氏爲琳妃○丁卯諭前因海疆經費浩繁降旨令各督撫熟籌良法茲據寶興奏自該督以至知府各有捐輸藉伸報效等語國家經費有常當此制用孔亟之時必應寬爲儲備全在該督撫因地制宜悉心籌畫總期於經費有益而仍無拂於民情卽如紳士商民情殷報效原不能阻其急公好義之忱亦不可稍涉抑勒若見任各官員一律捐貲殊非朕意所有該督等自請捐輸之處事不可行著無庸議○牛鑑奏英人占踞寶山將本地強壯丁男爲之搬運物件陸續留住補充擊斃洋人之數十一日從新間繞進上海北門縣城失守洋船由浦江駛入松江城外官兵出城嚴陣以待洋人開放大礮五六十聲我兵回擊洋船

仍由原路駛回○命賽尙阿爲欽差大臣馳往天津會同訥爾經額辦理防務○戊辰諭昨據寶興奏自該督以至知府各有捐輸報效當以事不可行降旨無庸議因思前據賀長齡奏貴州官員自巡撫以至州縣每年養廉分別捐出二成一成儲備經費朕以分年捐出且爲數無多業經允准惟見在四川官員捐輸旣已未允所請所有貴州前請按年扣廉之處亦著無庸議捐以昭畫一而示體恤○庚午牛鑑奏十四日寅刻英人又以火輪船二隻二桅大船三隻駛向東汶似欲上岸接仗壽春鎮總兵尤渤整隊相持洋船連放大礮我兵均伏在地隨用擡礮火槍更番疊進洋船始行怯退駛去○癸酉耆英伊里布奏遵旨馳抵江蘇接據該目來文內稱見已集兵不得不戰並有約實一處辦事地方等語釋其詞意似約地會商見在發給照會問其定在何處公商派外委

陳志剛等星馳送往俟有復信再行奏聞○劉韻珂因病賞假一月賞四品頂帶卞士雲三品頂帶署浙江巡撫○甲戌賞還故已革貝勒奕綺原爵賜葬嗣子載華降襲貝子○丙子諭余步雲見據奕經等派員解京俟解到時著交軍機大臣會同三法司嚴訊定擬具奏○丁丑以山東布政使楊慶琛爲光祿寺卿○吉林副都統果陞阿奏遵查產蕩山場事竣回任得旨所查情形若何有無弊竇一語不及無怪乎年來吉林所進之蕩甚覺不堪想蕩務廢弛極矣

六月戊寅朔日有食之○己卯命齊慎赴江蘇扼要應援○以王篤爲山東布政使調崇恩爲山東按察使以黃恩彤爲江蘇按察使由鹽運○甲申牛鑑奏請倣照乾隆年間征緬罷兵仍許朝貢事准予英人通商批中伊里布之害不淺矣曷勝憤懣又批朕之用

兵實出於萬不得已若將征緬之事比擬事不相類擬甚不倫想卿必爲伊里布簧惑矣朕愈加憂憤儻將士有所窺伺稍有解體將成瓦解可設想耶總因朕無知人之明自恨自愧○命伊里布回乍浦副都統任暫留耆英會同牛鑑辦理江蘇防勦事宜○丙戌牛鑑奏洋船五六十隻駛近福山其火輪船二隻已乘潮駛過江陰之鷁鼻嶺大小洋船均在江中寄碇等候探水見分飭鎮道將前備之火攻船整理周密相機截擊齊慎亦已趕赴京口○戊子賜葛雲飛子以簡舉人以敦武舉人鄭國鴻孫銛錫舉人○辛卯湖北荊州萬城隄決命裕泰堵治之並查恤災民○癸巳諭軍機大臣等本日據齊慎海齡奏洋船駛至京口開礮攻撲我兵連日接仗奮力堵擊又據耆英奏馳往應援各一招覽奏均悉此次齊慎等奮勇擊退可嘉之至齊慎劉允孝夙歷戎行忠勇素著海

齡亦能協同出力朕心欣慰惟盼迅奏膚功卽膺懋賞所有出力之滿洲綠營弁兵著查明保奏候朕施恩○乙未賞周天爵四品頂帶發往江蘇以知府補用○丙申牛鑑奏英人攻圍鎮江府城齊慎劉允孝退至新豐鎮○丁酉耆英齊慎奏洋船闖入大江攻犯京口我兵開礮擊斃數十人並落水多名英人復聚集多船蜂擁而至驟由西北分路登岸經齊慎督率將弁迎敵把總周兆熊手點擡礮擊斃騎馬紅衣頭目一人官兵乘勢下壓槍礮齊施並令刀矛手左右鈔襲傷斃三百餘名洋人復用車推礮上岸我兵仍奮力前進傷斃洋人不計其數洋人突由間道攻撲北門經副都統海齡督率弁兵併力堵禦詎復分股攻擊西南兩門城內突有火起提督劉允孝帶兵往救洋人用礮塞斷各路漢奸到處放火截殺前隊多有受傷不能前進惟時西南門竟被攻破府城失

守洋人猖獗我兵相持七八晝夜卒因兵分力單以致不支懇將
臣齊慎劉允孝從重治罪奏入命周兆熊以守備儘先升用先換
頂帶齊慎劉允孝仍暫行戴罪立功以觀後效○辛丑諭耆英奏
查明鎮江城陷時京口副都統海齡並其妻及次孫同時殉節該
副都統爲國捐軀忠義可嘉著加恩照都統例賜卹並著耆英派
委委員尋覓該副都統及伊妻伊孫屍身妥爲盛殮並查其見存
子女一同護送回旗該副都統有子幾人著俟百日孝滿後由該
旗查明一併帶領引見候朕施恩俟軍務完竣著該地方官建立
專祠以表忠藎伊妻及伊次孫均著附祀尋予諡昭節○奕經奏
江省待援緊急浙省防勦亦不容緩不敢率行帶兵前往候旨遵
行得旨兩省將軍督撫籌辦將及一載有何功效迨成今日之勢
尙自從容候旨遵行朕忿懣而外有何堪諭自恨無知人之明也

○耆英奏長江天險一旦失守是疏防於平時非貽誤於今日至江中葦洲林立儘可埋伏火攻並鑿其船底壞其槳舵得旨朕早計及於此無其人爲之朕徒然焦急忿恨奈何又奏一切埋伏事前未能籌畫批督臣以下所誤也○甲辰常恒昌緣事降調以孫善寶爲浙江布政使降調布政使○奕經奏請調陝甘兵二三千名派大員帶領在揚州一帶屯紮湖北江西安徽兵三四千名派大員帶領在江甯燕子磯一帶屯紮相機會剿得旨正所謂緩不濟急夢囈之談耳又奏請調甘肅撤拉爾回民三五千名揀員管帶撥赴天津江南軍營聽候調用批尤屬不可之事又批浙江非前鑒歟不但無尺寸之功翻致賊勢益張朕惟自恨自愧不能知人卽再簡派閩帥無非又添一層忿恨於國計民生有何補救

東華續錄

道光四十六

臣王先謙敬編

臣周瀚蕃恭校

秋七月戊申諭江蘇浙江沿海州縣轉徙流離耕耜失業轉瞬將屆刈穫之時該農民輸將無力何堪更事催科若待該督撫奏報誠恐展轉需時恩澤未能速逮所有江浙兩省被兵州縣除定海鄞縣鎮海三廳縣本年錢糧業經有旨豁免外其被兵各州縣本年錢糧漕米均著加恩悉予豁免至鄰近州縣雖未被兵亦恐有妨農業並著該督撫等分別查明請旨酌減十之二三以昭體恤該督撫卽刊刻謄黃徧行曉諭務使實惠均霑毋任吏胥滋弊用副朕軫念民艱速需恩膏之至意○己酉諭軍機大臣等奕經奏馳赴江省防堵並會同特依順等奏浙洋盜船擊退各一摺奕經

著仍遵前旨駐紮王江涇聽候耆英消息所奏行營糧臺令管通
羣管理管通羣昨已有旨署理浙江布政使所有行營糧臺事務
著另派一員管理至浙洋盜船爲數眾多總當設法捕獲務期淨
盡仍著該將軍等督飭地方文武各員實力勦辦毋稍疏縱並剴
切曉諭僞真能悔罪投誠呈繳器械並能殺賊立功卽當予以重
賞○辛亥耆英奏洋船西駛漸至浦口儀徵命沿江各省合力攻
勦互相援應○張晉熙以病免以張日晷爲河南布政使劉耀椿
爲四川按察使由福建興泉永道遷○壬子齊慎奏六月二十七夜隨營從
九品郭藩縣丞齊在銘等帶領精兵潛入鎮江府城分投暗襲擊
斃騎馬頭目一名刀砍棒擊傷斃洋人不計其數偵探洋人校場
點人共打斃八百餘名命出力員弁兵丁查明保奏○甲寅諭軍
機大臣等牛鑑奏夷船駛至省城伊里布奏馳抵江省各一摺覽

奏均悉著仍遵前旨剴切曉諭俾不至疑或藉口惟既經商議必應事事著實毋得稍留罅隙萬一仍不受撫不得不加大捷伐奮力攻剿該大臣務當妥爲籌畫相機辦理本日已由六百里加緊諭知奕經令其督兵進駐常州一帶耆英等如措辦了結卽飛咨奕經令其知悉如辦理不能得手更當飛咨奕經以便帶兵速來內外合剿毋稍遲誤○丙辰諭前任福建興泉永道劉耀椿朕因其係保舉人員官聲尙好昨將該員升任四川按察使茲據廖鴻荃奏失地之員轉邀升擢未愜眾望等語劉耀椿上年失守廈門經該督奏請嚴加議處維時因閩浙兩省失守各員多有未據奏到者是以未經降旨懲辦所有福建浙江及江蘇三省失守城池各員著該督撫迅速查明參奏毋得再有遲延遺漏劉耀椿既有應議處分自未便遽加升擢著以道員留於福建交怡良差遣委

用仍入於應議各員內一同覈辦○以潘鐸爲四川按察使

由廣東鹽運使

遷使

○己未耆英等奏英國大小兵船八十餘隻陸續駛入草鞋

峽江面當將允准通商之處專弁前往告知該目疊次覆文總稱臣等無權不能作主忽於初五日向差往之弁張攀龍聲稱初六日欲行開仗當揀派太倉州知州徐家槐外委陳志剛及張禧發給照會推誠布公復加開導該員弁馳至江邊見各船張挂紅旗車皆駕礮人盡執槍紛紛上岸排列陣式候時前進該員弁等將照會付給公商良久始鳴礮傳令撤落紅旗次第回船頭目嗎禮遜等向告英吉利與中國通商豈敢無故得罪中國之人兵戰連年實出於不得已見蒙准與通商情願聽候商議諭軍機大臣等覽奏已悉該酋既有不敢得罪中國情願聽候商議之語耆英已抵省垣著與伊里布牛鑑公同熟商如果就我範圍即可籌定大

局前降諭旨甚明惟必須通盤籌算永絕禍根慎毋仍墮奸謀致貽後患據奏南城儀鳳門最關緊要見在兵礮漸集著俟佐領塔芬布等回報後如情詞恭順再遣職分較大之員速行定議儻竟桀驁不馴難以理諭見在兵力已集地險可守全在該大臣等激勵將士或竟出奇制勝懋建殊勳該大臣之功甚偉也又奏初七日據該目將請求各款開列清單交委員塔芬布等攜回公同閱看係索討洋錢及貿易馬頭等款並據稱若能如所請不敢再啓兵端不如所請卽行開仗並往別省滋擾等語正在酌議詎料初八日英人聞有調兵防剿之信忽換紅旗定於次早開礮攻城查所謂各省官兵曾經挫衄未敢恃以爲固且江南民風柔懦男婦數萬號呼籲救不若姑允以保大局見已照會照議商定又諭覽奏念江南數百萬生靈一經開仗安危難保旣經該大臣等權宜

應允朕亦止可以民命爲重均著妥行定議惟既稱能如所請不敢再啓兵端見在業經俯允如何退出長江如何遣散回國該大臣等必當切實議定永杜兵萌不可稍涉含糊徒顧目前仍成不了之局○諭前因鎮江失守副都統海齡自縊殉難念其爲國捐軀特加優卹茲有人奏海齡查拏漢奸誤殺良民不計其數以致人心不服將該副都統圍住海齡因縱兵開礮轟擊夷聞內變乘勢直入府城海齡之死聞係被民戕害等語查拏漢奸本係守城要務若因此多殺無辜激成內變則其死殊不足惜惟奸民乘亂洩忿戕官縱賊實屬罪大惡極縱不能悉數誅夷必應將爲首數人立伸國法著將原摺鈔給程希采閱看畢竟鎮江如何失守海齡是否被戕確切查明據實具奏不得因海齡已死代爲彌縫亦不可因亂民較多意圖消弭○壬戌予江蘇死事上海縣典史楊

慶恩祭葬世職○癸亥諭軍機大臣等耆英等奏連日會議粗定條約一摺朕因億萬生靈所繫實關天下大局不得不勉允所請藉作一勞永逸之計非僅爲保全江浙兩省而然也所商各條內尙有應行籌酌之處卽如退出長江招寶山其前請之通商貿易五處除福州外其廣州廈門甯波上海四處均准其來往貿易不得占據久住至藉詞索欠一節該國與內地通商已二百年從前貨物交易銀錢往來俱係自行經理我國官員向不過問且此中貿易曲折價值低昂甚爲瑣屑況各國言語不通斷非地方官所能經理嗣後各處通商自應仍照舊章毋庸更改經此次議定之後該大臣等務當告以大皇帝相待以誠允准通商汝國亦應以誠相待斷不准再啓兵端違悖天理不但業經滋擾各省不得復來尋釁卽沿海之廣東福建臺灣浙江江南山東直隸奉天各省

地面亦不准駛入各省官兵應撤應留我國自有斟酌至內地舊有墩壘並礮臺等項亦應次第修築以復舊規並非擬自今日此係爲防緝洋盜起見不必妄生疑慮以上各節總在該大臣等深思遠慮切實定議永杜兵萌○戊辰命卞士雲管遼羣仍辦理糧臺○己巳諭軍機大臣等但明倫奏收復瓜洲招集匪徒各摺瓜洲業經收復著招徠居民妥爲撫輯仍飭員弁兵勇小心守禦毋得稍有疏懈至俄徵濱臨大江梟徒乘閒竊發見在招集頭目尙聽約束仍當妥爲彈壓毋任滋生事端其事平以後應如何設法解散之處著斟酌妥辦慎勿稍留後患其餘沿江各村自相團練均著照所議妥爲辦理○庚午江南桃北廳河溢命麟慶堵治之○壬申耆英等奏樸鼎查先有請臣等出城面訂之約當訂於十五日直至其三桅兵船該目貌甚恭謹旋於十九日在城外靜海

寺行答拜禮復請入城面訂和約詞甚諄切不得不俯順其請定於二十一日選擇公所委員妥爲照料俟入城定議再行錄呈○癸酉諭軍機大臣等圖明額等奏布噶爾伯克奪占霍罕地方差人進卡遞稟業經發給諭帖酌加賞賚護送出卡等語覽奏均悉所辦甚是布噶爾係卡外遠夷與霍罕蠻觸相爭自應置之不問惟該夷既將霍罕地方併吞其勢自強必當示以鎮靜密加防範至該夷與霍罕因何啓釁用兵奪占地方著圖明額等密派明白曉事誠實可靠之回子探得確實情形具奏○是月賑巴里坤地震災緩徵山東德州等二十二州縣衛旱災雹災新舊額賦展緩浙江嘉善等四縣衛水災雹災新舊額賦

八月戊寅著英奏廣州福州廈門甯波上海各海口與英吉利定議通商諭軍機大臣等耆英等奏和約鈐用關防一摺朕詳加披

閱俱著照所議辦理惟赴各口貿易無論與何商交易均聽其便
一節須曉諭與地方民人交易日久難保民人無拖欠之弊止准
自行清理地方官槩不與聞其各國被禁人口自應一律施恩釋
放以示格外之仁將來五處通商之後其應納稅銀各海關本有
一定則例所稱定海之舟山海島廈門之鼓浪嶼小島均准其暫
住數船俟各口開關卽著退出不准久爲占據應添註約內者必
須明白簡當不可草率了事據稱八月初十前後必可退出長江
著迅速妥辦以慰廬念○辛巳以趙光爲左副都御史曲大理寺卿還○
戊子麟慶以河防貽誤革職留任○己亥諭軍機大臣等麟慶奏
中河灌塘事宜業經籌辦一摺桃北漫口致阻回空軍船見在自
以疏通運道爲急務前據潘錫恩奏請於中河運道灌塘濟運如
趕辦不及卽用引黃濟運之法有旨諭令該河督詳勘具奏茲據

奏稱見辦灌塘事宜與所奏大略相同其應建草閘並築壩挑河各工業經估定興辦約計霜降以後軍船到有成數即可灌放無須引黃濟運等語著該河督督催各員弁妥速趕辦務期於回空軍船全數無誤是爲至要○壬寅命敬徵廖鴻荃馳往江蘇查勘河工○是月貸巴里坤地震災修屋費展緩江蘇川沙等十九廳縣歉收新舊額賦

九月丁未沈岐以親老乞終養允之以李宗昉爲左都御史

屬閩左都

史○戊申諭軍機大臣等據孟保等奏廓爾喀國王呈進表文一

摺此次廓爾喀差齋表貢到藏表文內添敘該國王屢被披楞欺陵求賜銀兩發兵堵禦並請易換藏屬地方等情又另有該國王之子呈進表文一道見據該大臣等明白開導諭以大義反復駁斥並將所呈披楞原信擲還所辦俱好該國求賞銀兩上次曾經

飭駁此次復行求賞實屬無厭至因披榜欺陵求請發兵救援並
懇易換藏地更屬無此體制必應逐一指駁以杜妄念該大臣所
擬檄諭底藁著卽遵照硃筆改定處繕發其該國王子無呈進
表文之例著暫爲存貯前藏俟噶箕等回國時仍令帶回○庚戌
江蘇巡撫程喬采奏洋船全數出江鎮江避難民人漸次遷回復
業已於鹽義倉碾穀一千石運往散放其土匪乘機竊發經委員
各處巡查見已均知斂戢上海寶山一切事宜應俟洋船駛出大
洋再行分別辦理其各處調防弁兵先後撤調歸伍並於各州縣
已經撤兵之處仍飭實力巡防不敢稍形鬆懈得旨俱著依議妥
辦○轉思華爲理藩院左侍郎以連貴爲理藩院右侍郎由內閣
學士遷
○辛亥諭麟慶等撫恤京口瓜洲被擾流民○賜浙江陣亡總兵
王錫朋子承泗承瀚舉人○癸丑命江浙軍營分撤歸伍○甲寅

諭前據耆英等奏海齡殉難屬實有旨仍照都統例賜卹並將陪
議卹典照議辦理本日復據耆英等奏尋獲海齡及伊妻伊孫屍
骸並京口副都統印信又查明道員稟揭各款並京口打仗陣亡
受傷官兵各一摺原任京口副都統海齡於鎮江城陷時自縊殉
難前據耆英等詢取旗員確供並閭營押結復據該城紳士等眾
口一詞其爲臨難捐軀已無疑義茲復尋獲屍骸眼同伊子宜琛
泰檢明認領並獲海齡原著葛紗袍襟及伊妻所帶玉環確鑒有
據且接獲漢奸亦止處斬十三人其餘訊係平民均經釋放是周
項原稟各款係屬得自傳聞而海齡見危授命大節無虧允宜特
爲宣布以息浮言前有旨准其照部議入祀京師昭忠祠並於該
地方建立專祠所有隨同殉難之伊妻伊孫俱著附祀專祠海齡
靈柩耆耆英等派員護送回旗至驍騎校祥雲先將副都統印信

投入井中旋即投水自盡其父馬甲長松業已陣亡其妻鄔琅罕
濟勒們氏慮遭汚辱先將二女刺死復自戕盡節伊母卜氏懷抱
伊幼子廷耀投塘遇救不知下落等情閩門殉難忠節兼全可嘉
可憫祥雲前已有旨附祀海齡祠內伊父馬甲長松除歸入陣亡
兵丁案內照例賜卹外著與祥雲妻女一併附祀以慰忠貞其母
卜氏其子廷耀仍著耆英等確切訪查務得實在下落無任流離
失所常鎮道周頊所稟失實著與該處城陷後未經殉難文武各
員一併查明再行嚴參所有該處陣亡官兵著卽交部照例賜卹
○戊午朱樹乞回籍養親允之命周天爵以二品頂帶署漕運總
督○己未諭牛鑑自升授兩江總督以來屢經朕飭諭小心防範
不可稍涉大意該督一味自恃止知嚴防吳淞海口迨夷船駛入
又不能守以致直犯長江進逼江甯省垣是數月工夫毫無准備

糜餉勞師令人忿恨見在業經就撫船隻全數出江入海朕軫念
黎民塗炭不得不曲意勉從耆英等所請准令通商俾吾民樂業
安居免罹鋒鏑而追維前事咎有攸歸牛鑑以一品大員封圻重
寄孤恩溺職有傷國體若不嚴加懲辦何以昭國法而勵官常牛
鑑著卽革職拏問由耆英派員解京交刑部治罪程喬采亦有守
土之責究因防護蘇州省城未經帶兵督戰與牛鑑有間德珠布
於鎮江失守亦有防堵不力之咎均著交該部分別嚴加議處尋
議均照溺職例革職得旨德珠布著加恩改爲革職留任六年無
過方准開復程喬采著降爲三品頂帶加恩改爲革職留任八年
無過方准開復○耆英等奏洋船全數出江入海請起粵東會辦
稅餉命耆英伊里布詳細商酌務臻妥善○以耆英爲兩江總督
由廣州將軍運
將軍運

○召奕山來京以伊里布爲欽差大臣廣州將軍辦理善

後事宜○庚申以防堵天津賞訥爾經額太子太保○辛酉以慧

成署河東河道總督

由兵部左侍郎署

○癸亥召奕經文蔚來京命齊慎

回四川提督任○戊辰諭軍機大臣等寄諭沿海各將軍副都統督撫提鎮等見在各海口仍應加意防範從前所設水師船隻幾同具文且今昔情形不同必須因地制宜量爲變通所有戰船大小廣狹及船上所列槍礮器械應增應減毋庸泥守舊制不拘何項名色總以製造精良臨時適用爲貴卽如各口岸所安大礮及屯守兵丁若令其終年在彼擺列駐紮斷無是理必應設法妥籌期於有濟至臨敵之際礮位兵丁不可排列前面後路應如何層層接應或旁鈔夾擊出奇設伏方可制勝無論陸路水師其兵丁應如何遴選技藝勤加訓練方臻純熟船上與岸上施放槍礮各有機宜應如何分別講究沿海大小島嶼可否另有布置儻仍視

爲一槩相同臨時安能得力至江海要隘如何布置方可扼要固守種種善後事宜著各就地勢悉心講求妥議章程具奏○甲戌諭軍機大臣等本日伊里布等馳奏遵旨會議一摺據奏通商輪稅則例案據俱在廣東必須到粵後體察情形方能酌辦其商欠不求代還一層已與議定載入條例各等語著伊里布於到粵後察看情形將稅課事宜妥行定議務當慎之又慎不准稍留罅隙○乙亥以李星沅爲陝西巡撫調孫善寶爲江蘇布政使實授卞士雲浙江布政使○是月展緩浙江海甯等八州縣災歉通賦緩徵直隸安州等十九州縣雹災水旱災新舊額賦

冬十月己卯諭程琳奏江豫捻匪竄入皖境拒捕傷人一摺江蘇蕭縣捻匪聚眾行劫前因職員王維嶽遣抱告在都察院具控業經降旨著周天爵等按名捕獲懲辦茲據程琳奏稱該匪縱

紅馬淙禹等竄至亳州拒傷差役壯勇多名逃往河南交界地方
藏匿等語匪徒結黨橫行該地方官亟應會營追捕拏獲究辦何
至任其出沒於數省毗連之地搶劫拒捕毫無忌憚捕務廢弛已
可槩見見在該匪等逃至河南交界地方難保不此挈彼竄愈聚
愈多著江蘇安徽河南各督撫分飭所屬文武員弁督率兵勇四
路兜擒務期按名弋獲盡法懲治以彰國法而靖閭閻儻各該地
方員弁仍前玩泄著卽嚴行參辦毋稍姑息如該督撫等辦理不
善使兇徒日久稽誅以致釀成巨案恐不能當此重咎也○庚辰
諭軍機大臣等怡良奏接到英文請釋臺灣俘囚據稱差人前赴
臺灣索取總兵津洪阿不收文書不合進見是以將原文送至廈
門等語臺灣所獲夷人除未經就撫以前業經正法外餘著達洪
阿等委員解至福建省城交怡良等轉交該目收領○乙酉諭軍

機大臣等達洪阿等奏四草湖樹荅湖各口均有草鳥船引導夷船往來聞駛經該文武員弁協力堵剿擊沈匪船多隻溺斃賊匪無數生擒匪犯林山一名又於淡水廳擊破草鳥船隻擊獲匪犯陳義等十二名各等語該匪等乘機行劫不法已極該鎮道飭屬兜拏悉數擒獲辦理妥協朕心實深嘉悅至見在沿海一帶奸民藉端滋事在所不免仍著達洪阿等督飭各屬加意嚴防總令無隙可乘土盜漢奸務要捕誅淨盡以絕後患是爲至要○王藻以親老乞養允之以葉名琛爲湖南布政使曲雲南按察使遷○丙戌諭國家命將出師征討有罪原以保疆土而申撻伐該將軍參贊等宜如何激勵將士申明紀律謀勇兼施克期奏績以副朕委任之重上年英擾粵省特命奕山爲靖逆將軍授以重兵前往攻剿乃奕山抵粵未卽入城遲回觀望不能奮我兵威及至占據香港事閱

年餘一味因循束手無策坐失事機厥咎甚重嗣因定海鎮海甯
波相繼失守爰命奕經爲揚威將軍文蔚特依順爲參贊大臣前
赴浙江徵調各路精兵俾得克復三城用揚我武乃奕經等駐紮
蘇州省垣籌畫數月集兵募勇以期一鼓成功覽其所陳分路埋
伏水陸並進各圖說其運籌非不周帀無如謀事不密先期漏洩
以致我兵到彼不能得手因之乍浦失陷傷我兵弁遂得直犯長
江毫無梗塞是奕經止知株守一隅不圖收復老師糜餉誤國殃
民文蔚擁兵駐紮紹興但以退守爲計一籌莫展殊屬無能又安
用此將軍參贊爲耶奕山奕經文蔚前已有旨飭令回京均著交
部治罪以示懲儆特依順齊慎到粵在後未與接仗惟特依順在
浙於乍浦失守不能設法救援齊慎帶兵前赴江蘇不能保守鎮
江事後又未能用兵收復亦有應得之咎均著交部嚴加議處○

調文柱爲雲南按察使以陸建瀛爲直隸按察使

由天津道遷

○庚寅

諭軍機大臣等前因南河楊工漫口應堵應改必須履勘定議特命敬徵廖鴻荃馳往確勘茲據奏稱改河之議有礙運道擇其利漕便民惟有堵築漫口挽歸故道尙屬守經不易之法請豫籌帑項陸續酌撥候明歲春融興工分挑舊河淤墊以工代賑再於七八月閒購集物料俟明年軍船回空築壩合龍等語朕詳加酌覈止可議堵據估需銀五六百萬兩著戶部豫爲籌畫酌量撥解俟明春興工挑挖淤墊秋閒購集物料俟軍船回空卽行築壩合龍務使黃流仍歸故道工程悉臻穩固以利漕行而禦水患至挑挖引河工段仍著敬徵等詳細查勘覈實估計並將陸續撥銀數目濟用緩急通盤籌畫妥議具奏○諭著英奏拏獲捻匪首夥各犯一摺徐州捻匪縱紅等膽敢在江蘇皖豫三省交界處所聚眾

滋擾拒敵官兵傷斃多命實屬目無法紀見經該督督飭鎮將會
合兜拏設法將首犯縱紅擒獲並獲夥犯李兆相等十二名所辦
甚好縱紅等著交該督嚴訊確供按律懲辦其在逃著名夥黨仍
飭屬上緊追拏務期悉數弋獲盡法嚴懲毋任一名漏網此次拏
獲捻匪縱紅究係如何設法及何人首先擒獲著該督據實查明
具奏候朕施恩○壬辰諭朕閱看江西省服制情實招冊內藍長
仔毆死胞兄藍木老仔一案唐五古毆死小功兄唐會鵬一案鄒
錫昭毆死大功兄鄒鈞一一案均係死者用刀柄向毆各該犯接
住刀柄求饒死者用刀拉奪不期奪回勢猛致刀尖自戳殞命因
思期功卑幼毆死尊長罪干斬決念其尙非有心干犯改爲監候
原屬法外之仁斷不容因有此例竟將一切服制重案率聽案犯
狡供移情就例展轉效尤如出一轍試思死者既經用刀向毆豈

有授人以柄反使刀尖內向以致自行戕傷且手握刀刃自不如持柄者之得力何以彼此相奪持柄者轉致鬆手殊非情理設使偶有一案朕尙不能斷其必無何以一省三案不謀而合顯有裝點情節著吳文鎔將藍長仔唐五古鄒錫昭三案親提全案人證覆加審訊務得確情按例定擬具奏本年旬到著刑部將此三起暫行扣除尋奏唐五古鄒錫昭二案訊與原審無異藍長仔一案訊屬有心干犯據實更正照例處決下部議從之○甲午諭天津爲畿輔藩衛見在添設防兵六千五百名之多該處所轄地面綿長舊有總兵一員於操防一切事宜勢難統轄朕意於額設總兵外再添設總兵官一員俾得分轄各營專司操練較爲得力因思巴里坤鎮總兵向歸烏魯木齊提督統轄尙可裁撤移置天津其該鎮弁兵卽移歸提標下管理所有巴里坤鎮所屬各營備弁等

官能否全撤抑或酌撤數員以抵天津添設額缺之處著兵部覈議具奏○諭載銓等奏遵旨定擬奕山等罪名一摺奕山奕經文蔚經朕授以將軍參贊重任特命前往廣東浙江辦理攻勦自應力矢公忠勉圖報稱乃老師糜餉坐失機宜孤恩昧良莫此爲甚奕山奕經文蔚均著照載銓等所擬革去職任定爲斬監候秋後處決奕山諒已自粵起程無論行抵何處著沿途各督撫傳旨鎖拏解京奕經等前有旨諭令折回浙江辦理軍需報銷此時毋庸留浙著耆英程希采劉韻珂傳旨鎖拏解京交宗人府刑部分別監禁其經手錢糧人員飭令留浙辦理報銷彙交軍需總局報部至特依順齊愼本應照部議革職惟念特依順到浙未經派令督兵接仗卽乍浦失守時伊亦駐紮杭州齊愼於廣州被圍時駐紮佛山且到浙在後追鎮江失陷尙能設法殺斃多賊尙可稍從末

減特依順齊慎著加恩改爲革職留任八年無過方准開復○諭
軍機大臣等文豐奏曉諭洋商購船一摺據稱洋商伍敦元購買
米利堅船一隻潘紹光購買呂宋船一隻駕駛靈便又紳士潘仕
成造成戰船一隻試驗足以禦敵等語著祁墳等撥歸水師旗營
交提督吳建勳督飭備弁等認真操演其船隻妥爲存泊毋令日
久損壞並著曉諭該紳商多方購造務須木料堅固堪備捍禦之
用爲要○治浙江定海各城失守文武員弁罪○乙未命戶部尙
書敬徵協辦大學士調恩桂爲吏部尙書以麟魁署禮部尙書
部左侍郎兼署○丙申轉端華爲戶部左侍郎調薩迎阿爲戶部右侍郎
連貴爲禮部右侍郎以玉明爲理藩院右侍郎
由副都統遷○戊戌先
是慶郡王奕綵服中娶妾下宗人府議處奕綵酬謝辦理處分之
經歷文彬錢文不入八分輔國公縣性圖革慶郡王爵可望承襲

許給供事劉均銀兩劉均復誘取奕綵多贓宗人府訪聞參奏

上命軍機大臣等會審至是訊明奏上諭宗人府供事劉均辦理議處文案膽敢誘取奕綵多財並於縣性亦聽取財物議有成數以備具奏後向其賄騙種種狡詐情節可惡著照議革去供事發往新疆給官兵爲奴仍著於宗人府門首枷號一箇月滿日卽行發遣不准留養已革宗人府經歷文彬以職官事後受賄情節較重著革去四品頂帶實發盛京雖據完贓不准輕減已革不入八分輔國公縣性圖革奕綵王爵向胥吏許錢居心巧詐陰險著實發盛京奕綵聽給劉均等錢文例應圖禁惟究係被人誑騙所致著革去郡王爵仍罰養贍錢糧一年加恩免其圈禁副理事官慶廉於劉均送給錢票雖經稟呈破案惟遲至三日後始行呈出又不將劉均卽行扣留送官殊屬紕繆著交該衙門嚴加議處楊三

卽得祿葛二卽增壽爲縣性許給劉均銀兩雖經罪坐家長惟希
冀革去奕綵王爵勸令縣性出錢打點情殊可惡楊三葛二著各
枷號一箇月以示懲儆縣悌失於覺察著交該衙門議處○己亥
諭軍機大臣等著英奏江蘇洋面肅清撫局已定善後事宜甚關
緊要該省吳淞海口及福山狼山並江陰之鵝鼻嘴圖山關一帶
層層門戶有險可憑果能嚴密備防天塹豈能飛越此時籌辦善
後必應大加整頓毋庸拘泥舊規該督見已起程前赴吳淞口及
沿江一帶察看情形著卽周歷各處相度地勢熟審機宜戰船不
拘大小務在堅固礮械不拘名色務取精良各處險要口岸若僅
安礮數位駐兵數名全無設伏策應之計恐臨事仍難得力必當
設法妥籌該督甫經接任責無旁貸必須力除錮習勉副委任一
切善後事宜悉心妥議具奏務使兵弁均能用命器械全數適用

平時不忘戰備臨事不致張皇方爲盡善勉之又勉○庚子諭奕
絲業已革爵著仍歸本支其應降襲貝勒之處暫行停止慶僖親
王著縣悌暫居本府奉祀○是月賑江蘇桃源沐陽二縣水災給
湖北江陵等四縣山西保德等三州廳縣災民口糧貸奉天牛莊
等處災民口糧蠲緩江蘇海州等五州縣湖南澧州等八州縣衛
新舊額賦緩徵山東臨清等三十九州縣衛陝西府谷縣湖北荆
門等二十八州縣衛安徽無爲等四十一州縣衛河南睢州等二
十七州縣山西保德等三州廳縣蠲災雹災水旱災新舊額賦奉
天甯海縣旗民歉收地租展緩齊齊哈爾等四處歉收通穀

十一月己酉諭訥爾經額奏請大沽設立海防同知一員作爲題
缺稽察入口出口船隻查驗票照有無夾帶違禁貨物及兵民強
買盜買漏稅等弊准理兵民客商詞訟其命盜重案仍歸縣辦照

海疆三年例滿本例升轉卽於本省簡僻同知通判內酌裁一缺等語著照所議辦理所有善後經費該督請於蘆綱加價銀內酌撥二十五萬兩以五萬兩作爲購備商船建造衙署之用以二十萬兩發商生息以八千兩陸續歸本以一萬六千兩作爲歲費如有盈餘年終報查儘數存貯天津道庫歸入交代等語准其酌撥籌辦○中定奉天直隸山東水師出洋會哨章程○庚戌諭本年七月南河桃上崔鎮汎地方黃河漫決該河督麟慶未能先事豫防咎有應得本應照上年東河成案革職枷號治罪姑念該河督趕辦灌塘俾回空軍船得以渡黃無誤且夏秋閒辦理防堵事宜亦尙妥當罪不掩功麟慶著卽革職加恩勉其枷號發遣○諭天津爲京畿藩衛前曾降旨將巴里坤總兵裁撤移置天津交兵部詳查具奏茲據該部奏稱嘉峪關外設立兩鎮一爲巴里坤一爲

伊犁而巴里坤尤爲扼要該處總兵未便裁撤惟伊犁鎮總兵與伊犁將軍駐紮相離甚近且綠營將備向歸將軍統轄可由該將軍就近稽察等語著照所議卽將伊犁鎮總兵裁撤移置天津其舊有之官弁著兵部酌裁十分之二三詳細覈議具奏至伊犁屯田兵丁應歸何員專轄兼轄之處並著陝甘總督伊犁將軍參贊大臣會同妥議章程奏明辦理○諭縣悌與伊弟縣性既屬同居其參奏奕綵又經聯銜於縣性圖革王爵等情斷難諉爲不知朕不爲已甚姑免深究若僅照議降一級調用未免過輕縣悌著革去不入八分鎮國公散秩大臣副都統降爲鎮國將軍以示薄懲○以潘錫恩爲江南河道總督調陳官俊爲吏部左侍郎何汝霖爲戶部右侍郎以祝慶蕃爲兵部右侍郎由御史遷○以載增爲內閣學士兼禮部侍郎銜由頭等衛選○辛亥實授慧成河東河道總

督調惟勤爲兵部右侍郎惠豐爲盛京戶部侍郎以訥勒亨額爲

盛京刑部侍郎

由駐藏幫辦大臣遷

○周天爵奏捻首馬宗禹就擒○丙辰

允周天爵回籍守制以廖鴻荃署漕運總督

由工部尚書署

○辛酉改八

旗另戶步甲爲技勇兵○治京口失守員弁罪○癸亥諭軍機大

臣等富呢揚阿等奏野番竄入青海設法搜捕一摺此次賊匪分

股滋擾戕害兵弁實屬異常兇狡斷不可任其得贖飽颺以致番

族效尤該督見將張銳撤任並飭令徐華清前往署理統帶弁兵

辦理防堵事宜所辦尙妥見屆大雪封山不值冒險深入此等野

番搶劫是其慣技若帶兵將備怠玩從事必致該番族等恃其兇

狡肆意滋擾著明歲春融督飭徐華清體察情形酌量多帶精兵

設法勦捕務將賊番漢奸密爲購殺躡緝毋任漏網○甲子耆英

奏英吉利控訴臺灣鎮總兵妄殺遭風被難洋人冒功捏奏雖屬

一面之詞而事涉外洋有關體制如實係妄殺冒功則該鎮咎亦難辭應請將臺灣鎮總兵達洪阿解部審辦以期水落石出得旨另有辦理之處此斷不可勿墮其術中也卽使實有其事亦當另有處治諭軍機大臣等據耆英由驛馳奏英吉利控訴臺灣鎮總兵冒功妄殺請旨將該總兵達洪阿解部審辦等語兩軍交戰之時明攻暗襲勢所必然加以言語不通來卽折之又何能望而知其爲難夷不知誅戮耶今旣通商不當藉口別生枝節耆英再行剴切曉諭見在臺灣於九月間救獲遭風白夷三十五人已於十月中旬由該道姚瑩給還該目懸挂彩旗迎接該道上船持酒起誓感激天朝總之未定通商以前兩國將備兵民各有傷損此一槩前事各宜置之不論若達洪阿守禦有功轉加重罪試思彼國出力大將豈能因我國一言遽令廢棄乎儻達洪阿實有貪功

妄報情事將來一經查訪明確自當以中國之例處之不必過問我國傷亡將士甚多又豈能於事定之後一一取償耶至見在籌議通商正在喫緊惟有速定大局以期干戈永息如此開導諒必盡釋前疑同守善定章程辦理矣尋命怡良渡臺查辦○丙寅以劉重麟爲左副都御史由宗人府府丞遷○丁卯諭已革兩浙總督牛鑑身任封圻辦理防堵半載有餘旣不能固守吳淞海口又不能嚴守長江以致寶山等縣及鎮江府城相繼失陷犯及省垣實屬防堵不密貽誤機宜牛鑑著照議定爲斬監候秋後處決○戊辰諭軍機大臣等劉韻珂奏米利堅國商船求在甯波報稅通商諭令仍回粵東不得逗留浙江旋即回船等語米利堅國向在粵省通商本有一定馬頭何以駛赴甯波希圖貿易見在該商船自三江口駛出招寶山復自招寶駛往定海是否業已開往粵東著該撫

委員確查儻仍希圖在浙貿易務當再行明白曉諭並嚴行飭諭內地商民毋許私售貨物致啓日後來浙之漸至該撫因屢次失陷地方自請從重治罪前此乍浦失陷部議上時業經明降諭旨加恩改爲革職留任矣此時毋庸再行議罪該撫惟當激發天良實心任事於地方一切公務認真辦理以副朕委任之意○甲戌給江蘇濱江被兵丹徒等六縣貧民口糧屋費並免通州等十三州縣廳衛額賦有差○是月給江蘇蕭縣徐州衛水災口糧蠲緩浙江淳安等三縣新舊額賦緩徵江西南昌等二十四縣江蘇高郵等六十一州廳縣衛陝西綏德等九州縣甘肅河州等二十七州廳縣災歉新舊額賦兩淮富興等十四場被災新舊額課

十二月庚辰治江蘇上海寶山失守文武員弁罪○辛巳召廖鴻

荃來京以李湘蔡署漕運總督

由太常寺少卿署

○壬午予江蘇睢甯縣

明季殉節總兵官周遇吉建祠歲祀○乙酉諭軍機大臣等耆英
奏查明上海寶山及吳淞口情形一摺吳淞口外爲由海入江必
經之路見在水師廢弛不獨巡洋未能得力卽江防亦屬無備思
之令人寒心該督議將外海內河額設戰船實數並水師各營原
有馬匹酌量變通然後整飭會哨以冀補牢著俟履勘各要隘形
勢再行通盤籌畫奏明辦理將來製造船隻必須木植堅實運用
靈捷方能得力若拘守舊制名爲修理戰船其實無濟於用又復
何所裨益至另片奏擬酌提寶蘇局洋銅數十萬斤鑄造大礮並
咨會河南代造擡礮等語製造礮位無論銅鐵總以精鍊爲要非
必專用銅礮始能及違命中且購辦銅斤不如購辦精鐵之易蘇
局見在所貯洋銅自應仍留備鼓鑄錢文該督等增鑄大小礮位
惟當廣購精鐵加工鎔鍊並調取廣東熟諳鑄礮工匠如式製造

務期一礮得一礮之用方爲妥善其擡礮一項以體質輕固者爲得用該督因江蘇所造未能如法已咨河南巡撫責成河北鎮昌伊蘇代造擡礮一千五百桿亦著照議辦理惟三十斤之礮尙恐運動未能靈便若每礮再減六七斤運用時當更得力並著該督咨會河南巡撫照辦○以廣福爲內閣學士兼禮部侍郎銜

天臚

府尹

○己丑直隸總督訥爾經額奏天津大沽南北兩岸暨迤南

狼坨子一帶天津鎮總兵足資控馭惟北塘五十餘里距甯河縣城二十餘里之蘆台地方爲北塘後路南界天津東北毘連豐潤永平府一帶西北地接通州實屬扼要之區請以新添總兵駐紮蘆台名爲通永鎮總兵官將北塘海口豐潤玉田采育三河寶坻張灣等營通州協右營暨提標山永協並所屬山海石門二路蒲河樂亭二營共十五營均歸統轄於蘆台安設中左右三營左營

應設總兵之中軍兼左營遊擊一員左營守備一員右營都司一員並左右兩營分設左哨千總二右哨千總二頭司把總二二司把總二又分防把總二經制外委六添設遊都守千把外委十九員覈計裁撤伊犁鎮標之遊擊等缺移抵外尙不敷守備一員千總一員卽於直隸簡僻營分內裁撥移駐並將新設鎮標之分防把總二員撥駐新河營城二汛將原設之經制外委二員撤歸鎮標差操其蘆台之專汛千總一員卽歸新鎮右營都司兼轄中左右三營撥兵一千名專操水陸技藝除蘆台本有專汛千總存營兵八十名外尙需兵九百二十名查蘆台營遊擊駐紮北塘計存營兵一千一百二十四名新鎮見駐蘆台爲北塘後勁擬將駐紮北塘之蘆台營遊擊作爲北塘營遊擊仍駐北塘於存營兵一千一百二十四名內撥兵六百二十名移駐蘆台其不敷兵三百名

擬於大沽協左右兩營暨葛沽營新兵內撥兵三百名共一千名連北塘之兵五百零四名作爲新鎮親標統計撥歸新鎮兵五千四百八十六名仍歸舊鎮管轄兵七千五百零四名下軍機大臣等議從之○庚寅諭軍機大臣會同三法司奏請將已革提督余步雲依律擬斬監候聲明情節較重請旨卽行正法等語著未經與議之大學士及九卿科道再行詳議具奏○諭前因浙江杭嘉湖道宋國經駐紮乍浦半載有餘辦理防堵事宜未能妥協降旨交部議處茲吏部照溺職例議以革職實屬咎所應得宋國經著卽革職以示懲儆○召程喬采來京以孫善寶爲江蘇巡撫文柱爲江蘇布政使趙光祖爲雲南按察使由浙江糧道遷○癸巳諭車登巴咱爾奏伊曾祖成衮札布之墳墓被掘傷及屍骸一摺車登巴咱爾之曾祖成衮札布前在將軍任內宣力有年實爲蒙古王中有

才德者乃伊墳墓被掘致傷屍骸殊爲異事務當趕緊捕賊徹底根究從嚴辦理著由馬遞馳交烏里雅蘇台將軍奕興參贊大臣車林多爾濟等轉飭該盟長會同提集應訊人等務期迅獲賊匪嚴審重辦斷不可稍涉輕縱致使違颺卽著該將軍等先委妥幹人員親往成衮扎布墳塋量爲堅固妥修齊整用示朕追念勳舊至意○調道慶爲兵部左侍郎以舒興阿爲盛京兵部侍郎由內閣學士

選○乙未治福建廈門失守文武員弁罪○

托渾布以病免以程

喬采爲山東巡撫

前任江蘇巡撫

○丙申賜江蘇陣亡提督陳化成子廷

芳世職廷綦舉人○戊戌諭前軍機大臣會同三法司議請將已

革提督余步雲依律擬斬聲明情節較重請旨卽行正法當令未經與議之大學士九卿科道再行詳議茲據合詞覆奏仍照原議定擬余步雲由行伍出身擢至提督與裕謙防守鎮海乃定海被

援總兵王錫朋等轉戰六晝夜之久余步雲並不督兵應援以致孤城失守三鎮陣亡已屬罪無可逭然使鎮海甯波保全無事則失救定海之罪尙可稍從寬貸迨夷船駛入鎮海余步雲身在行閒既不能衝鋒迎擊復不能嬰城固守鎮海失守退入甯波甯波失守退保上虞以一品武職大員身膺海疆重寄畏死貪生首先退縮以致帶兵將弁相率效尤奔潰棄城直同兒戲每一念及憤恨實深且廣東之關天培福江蘇之陳化成福建之江繼芸皆以提鎮殉難卽定海失陷總兵王錫朋葛雲飛鄭國鴻力戰陣亡鎮海甯波失事總兵謝朝恩被礮轟擊落海身死裕謙以文員督師殉節獨余步雲係本省提督乃竟志在偷生覩顏人世儻不寘之於法不惟無以肅軍政而振人心且何以慰死節諸臣忠魂於地下余步雲著照大學士九卿科道等會議卽行處斬派刑部尙

書阿勒清阿監視行刑以伸國法朕辦理刑名悉本欽恤各省應
死重囚苟有可原情節無不予以生全況係一品大員豈忍遽加
誅戮似余步雲之見敵輒退首作厲階實屬法無可貸不能不明
正典刑也將此宣諭中外知之○己亥調梁寶常爲山東巡撫程
裔采爲廣東巡撫○庚子諭前因耆英等奏變通水師章程並請
將赴部之員先行閱看鳥槍等語當降旨著兵部妥議章程茲據
覈議具奏嗣後水師將備各官赴部時著無須閱看馬箭如果練
習水務精熟槍礮遇升補時令該督出具切實考語將例應引見
各員分作四季給咨分限二五八十一等月按期赴部該部卽定
於二五八十一等月二十八日考驗先期奏請欽派御前侍衛乾
清門侍衛一二員會同該部堂官閱看槍礮其演槍步數著定爲
四十弓演礮以二出爲度均於城外酌擇寬闊地面演試如不能

合式卽將該員退回本任勒限演習並將原保督撫提鎮分別議處其中槍合式者准其帶領引見以示勸懲惟水師駕舟出洋施放槍礮與陸路情形不同全在帶領巡哨各員平日加意講求庶使該員弁等技藝精純能於洋面施放有準著江蘇浙江福建廣東山東各督撫提鎮嚴飭所屬勤加訓練於考拔弁兵題升將備時卽以此爲去取庶幾有志向上之員認真演習日就純熟不至視爲具文○諭軍機大臣等前經降旨令訥爾經額等會同妥議將盤山行宮就近由地方官管理茲據該督等會議具奏並將陳設等件開單呈覽據稱盤山行宮向派內園旗營官兵稽查非地方官所轄不如仍循其舊等語著照所議仍責成內園官兵看守所有陳設等件飭該總管妥爲收貯其外園地方著訥爾經額嚴飭該官兵並地方官隨時認真巡防毋稍疏懈嗣後不准奏請修

補一切工程○賞琦善四等侍衛爲葉爾羌幫辦大臣○定內務府署卿司員由總管大臣列等註考三院卿員隨京堂帶領引見○辛丑重修大清一統志成 御製序曰我大清之受 天命有天下增式廓而大一統者於今二百年洪惟 列祖 列宗威惠滂流聲名懿鏐幅員之廣教化之洽地利物華之盛官方名事之詳且備義繩軒駕以來未之有也 聖祖仁皇帝始命纂修一統志 世宗憲皇帝重加編輯至 高宗純皇帝御極之八年甫獲竣事嗣以 天威震疊開拓西域地二萬餘里因於四十有九年續有成書疊矩重規經緯翔實 皇考仁宗睿皇帝命史館重修未及告蒞爰泊朕躬荷神器付託之重撫茲區宇祗釋乎體國經野設官分職之大溯惟我 皇祖 皇考所以因時順地變通斟酌者日不輟書使非及時編定俾舊典有所承而後事有所起朕

實愧且懼焉茲全書告成沿述於開國之初增輯至嘉慶二十有五年爲卷五百有六十非務爲繁富以侈示後嗣也我 祖 宗以仁義中正治天下凡所損益如權衡之於輕重度量之於長短大小卽一州郡之升降一官職之分合一臣一民之予奪彰瘡無非本 單心之宥密垂爲律度布爲官禮除繁存質扶條就幹始獲成書實闕略是虞而何繁富之有稽昔禹貢九州爲後世方志之祖周禮大司徒以天下土地之圖周知地域廣輪之數漢書郡國志以下紀載日詳唐宋而還若元和郡縣志元豐九域志始專詳地理自爲一編顧政教所及皆弗克進及於古惟我朝 祖德宗功上繼五帝三王之盛信乎 心法治統不異地異民而理攬斯編也卽其迹而道載焉矣朕惟乾惕震恐翼迪 前光深知守成之難不殊於初始願與內外百執事勉固封守而阜兆民繼

自今無疆惟休亦無疆惟恤續有編錄視此典型是朕之厚望也
夫○諭耆英奏查參江陰以上鵝鼻嘴圖山關一帶均爲要隘已
故徐州鎮總兵王志元在彼駐紮防守所帶徐州鎮標各營官兵
素稱勁旅果能駕馭得宜悉屬可用乃王志元於吳淞口接仗觀
望不前旋即退避迨經飭赴江陰防守鵝鼻嘴不發一矢不放一
礮似此怯懦無能喪師失律情罪尤重若使其人尙在必應立置
重典以彰國法今雖倖逃法網仍應明正其罪王志元著卽追革
其職並奪封典其子孫永不准其出仕以昭炯戒京口左營千總
凌慶鼇候補千總趙慶元京口左營遊擊李澄署京口右營遊擊
事守備袁雙魁京口左營守備孫耀清或係水師汛守營員或係
水師將領均應設法堵截乃僅知株守陸地未能同心協力奮勇
阻遏均有應得之罪凌慶鼇趙慶元均著卽行革職李澄袁雙魁

孫耀清著交部分別嚴加議處○命李湘棻幫辦江南善後事宜
○耆英奏請以署漕運總督李湘棻暫署徐州鎮總兵官得旨朕
原有將伊量材改武之意又因漕督一時簡署乏人是以未發耳
○是月給福建峯市等三廳縣水災口糧屋費並緩徵額賦展緩
浙江烏程等四縣積歉帶徵銀米○是歲朝鮮琉球來貢○會計
天下民穀數各省通共大小男婦四萬一千四百六十八萬六千
九百九十四名口各省通共存倉米穀三千二百十四萬九千三
十石七斗七升九合一勺